

ዛካራሳ ቲንቢቲ ጊዶ ቆፋ

ናቤ ዛካራሳ ማጻፋይ ናሞኡ ከዚ ሻኬቲደስ፡ 1፡ ሼም 1-8 ከርስቶሲ ዬሌታናፔ ካሴ ኢቻሽ ጾታኔ ናሞኡ ታሙ ላይላፌ ቢዲ ኢቻሽ ጾታኔ ታማኔ ኦስፑን ላይላ ጋካና ዲዛ ላይላታ ጋርሳን ዲማ ዲማ ዋዴታን ናቤ ዛካራሲ ዮቲዳ ቡሮፔ ሃናና ቃላታ ኦይኪዳ ከፊሌታኮ፡ ሄይቲካ ሄ ቲንቢቲ ቃላቲ አጂታ ማላን ሸቂዳይታ ጊዲሺን ዬሩሳላሜ ኦራጾ ገሻስ ጎዳ ከላይ ሰሚ ከጾታናይሳ ገሻስ፡ ጎዳይ ዳሬዛ ቡሮ ጌሻናይሳ ገሻሴኔ ሲንላፌ ያና ማሲሄዛ ገሻስ ዮቲዳይታ፡ 2፡ ሼም 9-14 ጋካናስ ዲዛ ከፊሌዚ ጉዬፔ ታኪዲ ሃናናይሳ ዮቲዳ ቃላታ፡ ሄይቲ ሄ ቡሮፔ ሃናና ቃላቲ ዮቲዳይ ቡሮፔ ያና ከርስቶሳ ገሻሴኔ ወርሴላ ፒርዳ ገሻሳ፡

ሃ ማጻፋይ ኦይኪዳ ኩሜላ ቆፋይ

ኮይሮ አጂታይ ፓራታኔ ቶጋ አሳታ 1:1-7

ናሞኦንላ አጂታይ ሜዶሳታ ካጩታ 1:18-21

ሄቫንላ አጂታይ ዋዳ ዋዶሮ 2:1-13

ኦይዳንላ አጂታይ ናቤ ዛካራሲ ቄሴታ ሃላቃ ገሻስ ቤኢዳ አጂታ 3:1-10

ኢቻሻንላ አጂታይ ጸምፔኔ ዋጋራ ሚላታ 4:1-14

ኡሱፑንላ አጂታይ ፒራዲዛ ጸላ ማጻፋ 5:1-4

ላፑንላ አጂታይ ዳቾ ጊዶን ዲዛ ማጫሳዮ 5:5-11

ኦስፑንላ አጂታይ ፓራ-ጋሬታ 6:1-8

ኢያሶ ቲይዲ ካዋሳና ማላ ኢሜቲዳ አዛዙ 6:9-15

ጸሲ ቤሶንታ ጸማ ኤኮንታይሳ 7:1-7

ኣዛዜቶንታ ኢጶይ ጎዴቲላስ ጋሶ ጊዴላ 7:8-14

ጸሲ ዬሩሳላሜ ገሻስ ኢሚዳ ሂዶታ 8:1-23

ጸሲ ባ ዳሬዛ ኣሺዲ ኢስታ ሞርኬታ ቃጸያናይሳ 9:1—11:3

ኢስራኤሌ ኣሳ ካሌሊዛ ናሞኣታ 11:4-17

ዬሩሳላሜ ጸኖ 12:1-9

ዳሬዚ ኦላን ጫዴቲዳይሳስ ቃዴቲዲ ጎዳኮ ሲሞ 12:10—13:9

ወርሴላ ኦላኔ ጎዳ ጸኖ 14:1-21

እሳይ ጸሳኮ ሲማና ማላ ጎዳይ ጸይጌስ

1 ዳሪዮሲ ካዋቲዳ ናምኣንሶ ላይላን ኦስፑንላ ኣገናን ጎዳ ቃላይ ኢዶ ና ባራካዬ ና ናቤ ዛካራሳኮ ዪዴስ፤

2 «ጎዳይ ካሴ ኢንቲ ኣዋታ ቦላ ከሂ ሃንቄቲዴስ፡፡

3 ሃኢ ጊዲኮ እሳስ፡ ታኮ ሃ ሲሚቲ፤ ታኒካ ኢንቲኮ ሲማና ጌስ ኡባፌ ዋልቃማ ጎዳይ፡፡

4 ካሴ ናቤቲ ኢንቲ ኣዋታስ፡ «ኢንቲ ኢንቲ ኢታ ኦጌፔኔ ኢንቲ ኦሶፔ ሲሚቲ» ጊዲ ሚንሒ ዮቲዳ፤ ጊዶ ኣቲን ኢስቲ ቃሴ ሲዪቤቲናኔ ታ ኣዛዞካ ናጊቤቲና፤ ሄሳ ማላ ኢንቲ ኢንቲ ኣዋታ ማላ ሃኖፒቲ፡፡

5 ካሴ ኢንቲ ኣዋቲ ሃኢ ኣዋን ዲዞ? ናቤቲካ ሜርናስ ዴኣንዴቶ?

6 ጊዶ ኣቲን ታኒ ታ ናቤታ ባጋራ ዮቲዳ ቃላቲኔ ዎጋቲ ኢንቲ ኣዋታ ቦላ ጋኪቤቲኔ? «ኢስቲካ ማርቲላን ጌልሒሼ ኡባፌ ዋልቃማ ጎዳይ ባ ኮዪዳ ማላ ኑ ኦሶ ማላኔ ኑ ኦጌ ማላ ኑስ ቤሲዛዝ ኑ ቦላ ኦሒዴስ» » ጊዳ፡፡

ዛካራሲ ኣጂታን ቤኢዳ ፓራታ

7 ዳሪዮሲ ካዋቲዳ ናምኣንሶ ላይላን ሹባጼ ጌቲቲዛ ታማኔ ኢሲንሶ ኣገናን ናምኡ ታማኔ ኦይዳንሶ ጋላሳን ጎዳ ቃላይ ኢዶ ና ባራካዬ ና ናቤ ዛካራሳኮ ዪዴስ፡፡

8 ኦማርሳ ዋዴ ኣጂታን ዞኦ ፓራ ቶጊዳ ኢሳዴ ቤኣዲስ፤ ሄ ኢዚካ ሸባ ጊዶን ባርሲኔቲ ሚላታ ጋርሳን ኤቂዴስ፤ ቃሴ ኢዛ ጉዬራ ዳማ፡ ዞኦኔ ቦላ ፓራቲ ዴቲስ፡፡

9 ታኒካ፡ «ታ ጎዶ ሃይታንቲ ኣዜ?» » ጋዳ ኦይቻዲስ፤ ታናራ ሃሳይዛ ኪታንቻዚ ቃሴ፡ «ሃይታንቲ ኢስቲ ኣዛኮ ታኒ ኔና ቤሳና» ጊዴስ፡፡

10 ሄ ባርሲኔቲ ሚላ ጋርሳን ኤቂዳይሲ፡ «ሃይቲ ቢታ ኡባ ቦላ ሲሜሬቲ ጸዋሳና ማላ ጎዳይ ኪቲዳይታ» ጊዴስ፡፡

11 ኢስቲካ ባርሲኔቲ ሚላ ጋርሳን ኤቂዳ ጎዳ ኪታንቻስ፡ «ኑ ቢታ ኡባ ቦላ ሲሜሬቲ ጸዋሲዶስ፤ ቢታ ኡባይ ዎፑ ጊዲ ዴስ» ጊዳ፡፡

12 ሄሳፌ ጉዬ ጎዳ ኪታንቻይ፡ «ኡባፌ ዋልቃማ ጎዳዉ! ላፑን ታሙ ላይላታን ኔ ኢስታ ቦላ ሃንቄቲዳ ዬራሳላሜኔ ዩሁዳ ካታማታ ኔ ኣዪዴ ጋካናስ ማርኪ?» » ጊዴስ፡፡

13 ጎዳይካ ታናራ ሃሳይዛ ኪታንቻስ ኡፋይሲዛ ቃላኒኔ ሚንሒዚ ቃላን ማልሒ ዛሪዴስ፡፡

14 ቃሴካ ታናራ ሃሳይዛ ኪታንቻዚ፡ «ሃይሳ ቃላ የታ፤ ኡባፌ ዋልቃማ ጎዳይ፡ ታኒ ጸዮኔሲኔ ዩሩሳላሜስ ኬሃ ቃጴታይሰ።

15 ጊዶ አቲን ሳርቲል ዳሚዲ ዋፓን ዲዛ ካዋቲላታ ኬሃ ሃንቄታዲሰ፤ ሄሳስ ጋሶይካ ታኒ ታ ዳሬዛ ቦላ ጉላራ ሃንቄቲን ካዋቲላቲ ታ ቆፋፔ ቦላራ ታ ዳራ ቆሂዳን ጊዳሰ።

16 «ሄሳ ገሻስ ኡባፌ ዋልቃማ ጎዳይ፡ ታኒ ታ ማርቲል ዩሩሳላሜስ አማና፤ ሄንካ ታ ኬላይ ሰሚ ኦራዲዲ ኬጾታና፤ ዩሩሳላሜ ካታማያካ ዋዶሮን ዋጴታናን ጌሰ።

17 «ካሌሊዲካ ኪታንቻዚ፡ «ኡባፌ ዋልቃማ ጎዳይ ታ ካታማቲ ኬሂ ዲሬታና፤ ጎዳይ ዩሩሳላሜ ካሴ ማላ ማዳናኔ ባ ካታማ ሂሰቲ ዶራና » ጊ አዋጁቲ።

ዛካራሲ አጁታን ቤኢዳ ኦይዱ ካጩታ

18 ሄሳፌ ጉዬ አጁታን ኦይዱ ካጩታ ቤኢዲሰ።

19 ታናራ ሃሳይዛ ኪታንቻዛ፡ «ሃይቲ አዜ?» ጋ ኦይቻዲሰ፤ ኢዚካ፡ «ሃይቲ ዩሁዳ አሳ፡ ኢሰራኤል አሳኔ ዩሩሳላሜ አሳ ላሊዳ ካጩታ» ጊዳሰ።

20 ሄሳፌ ካሌሊዲ ጎዳይ ናሪቃ ኦይኪዳ ኦይዱ ዋጋጩታ ታና ቤሲዳሰ።

21 ታኒካ፡ «ሃይታንቲ አይ ኦላና ዪዶ?» ጋ ኦይቻዲሰ። ኢዚካ፡ «ሃይቲ ኦኒካ ቶቁ ጊ ጸሎንታ ማላ ዩሁዳ ቢታ ላሊዳ ካጩታ፤ ሃ ዋጋጩቲ ዪዳይ ኢሰታ ዳጋንላናሲኔ ዳራ ላላናሰ ዩሁዳ ቦላ ባንታ ካጩ ዴንሊዳ ካዋቲላታ ካጩ ሜንሊ ኦላናሳ» ጊዳሰ።

2

ዛካራሲ አጁታን ቤኢዳ ዋቋ ዋዶሮ

1 ቃሴካ ታ አጁታን ዋቋ ዋዶሮ ባ ኩሼን ኦይኪዳይሳ ቤኢዲሰ።

2 ታኒካ ኢዛ፡ «ኔ አዋ ባይ?» ጋ ኦይቻዲሰ። ኢዚ ቃሴ፡ «ዩሩሳላሜ አዲሳቲላይኔ አኮቲላይ አፑን ዋቋኮ ዋቋ ቤያና ባይሰ» ጊዳሰ።

3 ሄ ታናራ ሃሳይዛ ኪታንቻይ ቢዳሰ። ሃራ ኪታንቻይካ ኢዛራ ጋጋናሰ ዪዳሰ።

4 ሂሰቲዲ ኢዛሰ፡ «ዋጸ ባዳ ሄሳ ናቲላ አዳዛሰ፡ «ዩሩሳላሜይ ኢዚን ዲዛ አሳ ዳሮቲላፌኔ ሜሄ ዳሮቲላፌ ዴንዶይሳን ካታማ ዩሹን ገምቤ ዲርሳ ኮሼና።

5 ታኒ ታርካ ኢዚሰ ታማ ዲርሳ ጊዳና፤ ኢዚ ጊዶን ታኒ ኢዚሰ ቦንቾ ጊዳናን ጌሰ ጋዳ የታ» ጊዳሰ።

ቤቲዳ አሳ ሲሞ

⁶ ጎዳይ ባ ዳራ፥ «ታ ካሴ አንቴና ኦይዱ ባጋ ላላዲስ፤ ሃኢ ጊዲኮ ፑዴሃ ባጋፌ ባቃቲ ኬዚቲ፤ ሃ ጹቲ።

⁷ ሃኔ ጸዮኔ ሃ ያ፤ ባቢሎኔ ማጫ ናይታራ ዳኢዛሬ ኢስታ ጊዳፌ ባቃታ።

⁸ ኡባፌ ዋልቃማ ጎዳይ፡ ባ ቦንቾ ቆንጨሳና ማላ ባ አሳ ቦንቂዳይታ ካዋቴላኮ ታና ኪቲዳስ፤ አንቴና ቦቺዛይ ታስ ኣይፌ ጨር ቦቺዛ ማላ።

⁹ ሄኮ ታኒ ታ ኩሼ ኢስታ ቦላ ዴንላና፤ ኢስታ ኣይሌቲ ኢስታ ቦንቃና፤ ሄሳፌ ጉዬ ኡባፌ ዋልቃማ ጎዳይ ታና ኪቲዳይሳ አንቴ ኤራና።

¹⁰ «ሃኔ ጸዮኔ ናዬ ኣኔ ኢሊላ፤ ኡፋዬታ፤ ታኒ ያዳ ኔ ጊዶን ዳና» ጌስ ጎዳይ።

¹¹ ሄ ጋላስ ዳር ካዋቴላቲ ጎዳኮ ሸቂዲ ኢዛ ዴሬ ጊዳና፤ ኢዚካ ኔ ጊዶን ዳኣና፤ ኡባፌ ዋልቃማ ጎዳይ ታና ኔኮ ኪቲዳይሳ ኔካ ኤራና።

¹² ጎዳይ ጌሻ ቢታይን ዩሁዳ ባስ ቡዞ ሂስቲ ላታና፤ ዩሩሳላሜካ ዛሪ ዶራና።

¹³ ጎዳይ ጌሽ ጊዲዳ ባሶዛ፤ ዴንዲዳ ጊሻስ ኣሾ ማይኢዳ ኡባይ ኢዛ ሲንላን ጮኡ ጎ።

3

ቄሴታ ሃላቃስ ጊዲዛ ጌሻ ማይኦ

¹ ሄሳፌ ጉዬ ቄሴታ ሃላቃ ኢያሶይ ጎዳ ኪታንቻ ሲንላን ኤቂዳይሳኔ ጸላኤይካ ኢዛ ሞታናስ ኢዛ፤ ኡሻቻ ባጋራ ኤቂዳይሳ ታና ኣጁታን ቤሲዳስ።

² ጎዳይ ቃሴ ጸላኤ፥ «ሃይሶ ጸላኤ ጎዳይ ኔና ሴር፤ ዩሩሳላሜ ዶሪዳ ጎዳይ ኔና ሃንቆ፤ ሃይሲ ኣዴዚ ታማ፤ ኣቲዳ ዱርጫ ጊዴኔ?» ጊዴስ።

³ ኢያሶይካ ቂታ ማይኦ ማይኢዲ ኪታንቻዛ ሲንላን ኤቂዳስ።

⁴ ኪታንቻዚ ባ ሲንላን ኤቂዳይታ፥ «ሄሳ ቂታ ማይኦዛ ኢዛ ቦላፌ ቃሪ ዲጊቲ» ጊዴስ፤ ኢያሶስካ፥ «ሄኮ ታ ኔ ናጋራ ኔ፤ ዲጋዲስ፤ ታ ኔና ሎኦ ማይኦ ማይዛና» ጊዴስ።

5 ቃሴ ታኒካ፡ «ጌሻ ጎሴ ኢዛ ሁኤን ጎዚሲቲ» ጋ አዛዛዲሰ፤ ጎዳ ኪታንቻይ ኢዛ አቻን ኤቂ ዲሺን ጌሻ ጎሴ ኢዛ ሁኤን ጎዚሲዳኔ ማይኦካ ማይዚዳ።

6 ጎዳ ኪታንቻይካ ኢያሶይ ናጌታና ማላ ኢዛሰ ዞሬ ኢሚዴሰ።

7 ኡባፌ ዋልቃማ ጎዳይ፡ «ኔ ታ ኦጌን ቢኮ፡ ኔ ታ አዛዛ ናጌኮ ታ ኬላ ኔ አይሳና፤ ጊቤዛሲካ ኔ አዋታና። ቃሴካ ሃይሳን ኤቂዳይታራ ኢሲፌ ኔ ጌላና ማላኔ ኬዛና ማላ ታ ኔሰ ማታ ኢማና።

8 «ሃይሶ ቄሴታ ሃላቃ ኢያሶ ሲያ! ኔ ማታን ኔና ኦሊ ማዲዛይቲ ቡሮ ሲጎላፌ ሃናና ሎኦ ማላታ ጊዲዳ ጊሻሰ ኢሰቲካ ሲዬቶ፤ ሄኮ ታኒ ቡሮ ፑርጪዛ ታ አይሌዛ ኤሃና።

9 ቤያ! ታኒ ኢያሶ ሲጎላን ላፑን አይፌይ ዲዛ ሹቾ ዋላና፤ ታ ሄ ሹቾ ቦላን ጸፌቲዛዝ ዋጫ ዋጫ ጸፋና፤ ሄ ቢታይ ናጋራካ ታ ኢሲ ጋላሰ ዲጋና» ጌሰ።

10 ኡባፌ ዋልቃማ ጎዳይ፡ «ሄ ዋዴ ኢሶይ ኢሶይ ባ ዋይኔ ሚላ ጋርሳኒኔ ባ ባላሴ ሚላ ጋርሳን ባ ላጌ ዲጊሳሰ ጸይጋና» ጌሰ።

4

ዛካራሲ አጂታን ቤኢዳ ጸምፔ ዋሊዛሶኔ ዋጋራ ሚላ

1 ታና ሃሳይሲዳ ኪታንቻዚ ሲሚ ዪዲ ኢሲ ኢሲ ኣሲ ጴሰኮፌ ቤጊዛ ማላ ታና ቤጎሊዴሰ።

2 ኢዚካ፡ «ሃይሶ ሄሲ ኔ ቤኢዛይሲ አዜ?» ጊዴሰ። ታኒካ «ሄኮ ኢዛ ቦላ ዛይቲ ኦቶይ ዲዛ ኩሜላራ ዋርቃ ጊዲዳ ጸምፔ ዋሊዛ ባላ ቤኣዲሰ፤ ሄ ባላታ ቦላ ላፑን ቦምባይ ዲዛ ላፑን ጸምፔታ ቤኣዲሰ።

3 ቃሴካ ናምኡ ዋጋራ ሚላታ ቤኣዲሰ፤ ኢሰታፌ ኢሶይ ዛይቲራ ዲዛ ኦቶዛፔ ኡሻቻ ባጋራ ዲዛይሳ ቃሴ ኢሶይ ሃዲርሳ ባጋራ ዲዛይሳ ቤኣዲሰ» ጋዲሰ።

4 ታናራ ሃሳይዛ ኪታንቻዛ፡ «ታ ጎዶ! ሃይታንቲ አዜ?» ጋ ኦይቻዲሰ።

5 ኢዚካ ታሰ፡ «ሃይቲ አዛኮ ኔ ኤርኪ?» ጊ ዛሬዴሰ። ታኒካ ኢዛሰ፡ «ታ ጎዳዉ! ታ ኤሪኬ» ጋዲሰ።

6 ቃሴካ፡ «ጎዳይ ዜሩባቤሌስ የቲዳ ቃላይ ሃይሳ፡ ታ ኣያናንፔ ኣቲን ዋልቃኒኔ ሚኖቲላን ጊዳና፡ ጌስ ኡባፌ ዋልቃማ ጎዳይ።

7 «ሃይሶ ጌታ ዙማዞ ኔ ኣዜ? ኔ ዜሩባቤሌ ሲንላን ቲዲ ጊዳ ዴምባ ጊዳና፤ ቃሴ ዜሩባቤሌይ ጸሳ ኬላ ኬጸ ጊጊዲ ቁስቲ ሹቻ ፑዴ ኬሲዛ ዋዴ ኣሳይ፡ ሃሹ ሃሹ ሎኦን ፖሌቲዴስ፡ ጊ ሳባና» ጌስ።

8 ቃሴ ጎዳ ቃላይ ታኮ ዪዴስ፤

9 «ዜሩባቤሌ ኩሼይ ሃይሳ ጎዳ ኬላስ የቻ ሹቻ ዋሊዴስ፤ ኢዛ ኩሼይ ኬጸ ፖላና፤ ሄሳፌ ጉዬ ኡባፌ ዋልቃማ ጎዳይ ታና ኢንቲኮ ኪቲዳይሳ ኢንቲ ኤራና።

10 «ጉላ ሚሻቲ ሃኒዛ ጋላሲ ካዲዳይ ኦኔ? ኣሳይ ዜሩባቤሌ ኩሼን ቱምቤ ቤኢዲ ኡፋዬታና፤ ሄይቲ ላፑን ጸምፔታ ኢስታ ቦላ ዋሊዛ ላፑን ባላቲ ኣላሚ ቦላ ዩዪ ጸሊዛ ጎዳ ኣይፊታ።»

11 ሄሳፌ ጉዬ ታኒ ኪታንቻዛ፡ «ጸምፔዛፔ ኢስታ ቦላ ዋሊዛ ባላታፔ ኡሻቻ ባጋራኔ ሃዲርሳ ባጋራ ዲዛይቲ ሃይቲ ዋጋራ ሚላቲ ኢስቲ ኣዜ?» ጋ ኦይቻዲስ።

12 ቃሴካ፡ «ናምኡ ዋርቃ ቦምባታ ኣቻን ዋጋራ ዛይቲይ ኢስታፌ ጉኪዛ ናምኡ ቦምባታ ማታን ዲዛ ናምኡ ዋጋራ ሃጋቲ ኣዜ?» ጋ ኦይቻዲስ።

13 ኢዚካ ታና፡ «ሃይቲ ኣዛኮ ኔ ኤርኪ?» ጊዴስ፤ ታኒካ ኢዛስ፡ «ታ ጎዶ! ታ ኤሪኬ» ጋዲስ።

14 ኢዚ ቃሴካ፡ «ሃይቲ ናምኣቲ ሜዴቲላ ኡባ ጎዳ ሲንላን ኣላና ቲዬቲዳ ኣሳታ» ጊዴስ።

5

ፒራዲዛ ጸላ ማጻፋ

1 ታ ዛራዳ ጸሊሺን ሄን ታ ሲንላን ኢሲ ፒራዲዛ ጸላ ማጻፋ ቤኣዲስ።

2 ኢዚካ ታና፡ «ኣይ ጸላይ?» ጊ ኦይቹዴስ። ታኒካ ኢዛስ፡ «ኣዲሳቲላይ ናምኡ ታሙ ዋዳ፡ ጎምፓይ ታሙ ዋዳ ጊዲዳ ኢሲ ፒራዲዛ ጸላ ማጻፋ ቤኣዲስ» ጋዲስ።

3 ኢዚካ ታስ፡ «ሃ ጸላ ማጻፋ ጊዶን ቢታ ኡባ ቦላ ያና ቃንጌሊ ጸፊቲ ኡቲዴስ፤ ሄ ማጻፋን ኢሲ ባጋራ፡ ሳይሶ ኡባይ

ቢታ ቦላፌ ዳያና፣ ጌቴቲ ጸፊቲዳስ፤ ቃሴካ ሃንኮ ባጋራ፣ «ዋርዶ ጫቂዛ ኡባይ ዳያና፣ ጌቴቲ ጸፊቲዳስ።

⁴ ኡባፌ ዋልቃማ ጎዳይ፣ «ታኒ ቃንጌል ኤሃና፤ ኢዚካ ካይሶታ ኬሊኔ ታ ሱንገላን ዋርዶ ጫቂዛይታ ኬል ጌላና፤ ኢሰታስ ሄን ዲዛ ኬላ፣ ሚላኔ ሹቻ ኡባ ዳይሳና፣ ጌሰ» ጌዳሰ።

ዳቾ ጊዶን ዛካሪሲ አጂታን ቤኢዳ ማጫሳዮ

⁵ ሄሳፌ ካሊዲ ታናራ ሃሳዬቲዛ ኪታንቻይ ታኮ ዪዲ፣ «ሃይሲ ዪዛይ አዛኮ ጶቁ ሂስታ ጸላ» ጌዳሰ።

⁶ ታኒካ ኢዛ፣ «ሃይሲ አዜ?» ጋ ኦይቻዲሰ። ኢዚካ «ሃይሲ ማካ ዳቾ» ጌዳሰ፤ ቃሴካ ጉጂዲ፣ «ሃይሲ ቢታ ቦላ ዲዛ አሳይ ኦሊዳ ቆሆዛ ቤሲዛ ማላታ» ጌዳሰ።

⁷ ሄሳፌ ጉዬ ኢርሳሴ ጌቴቲዛ ቢራታፔ ኦሴቲዳ ካማይ ቃሬቲዛ ዋዴ ዳቾዛ ጊዶን ኡቲዳ ኢሲ ማጫሳዮ ቤኢዲሰ።

⁸ ኪታንቻዚካ ታሰ፣ «ሃና ቱና» ጊ ዮቲዲ ኢዞ ጉዬ ዛሪ ዳቾዛ ጊዶ ናቂ ጌልሊዳስ፤ ሄ ዳቾ ካማዛካ ዛሪ ካሚዳስ።

⁹ ሄሳፌ ጉዬ ታኒ ፑዴ ጶቁ ጋ ጸሊሺን ኢሰታስ ቄፊታን ጫርኮይ ዲዛ ናምኡ ማጫሳታ ቤኢዲሰ፤ ኢሰታስ ቄፊይካ ካፎ ዋሌ ቄፊ ማላ፤ ኢሰቲ ሄ ዳቾዛ ዴንሊ ኤኪዲ ፑዴ ሳሎ ፒራዲዳ።

¹⁰ ታኒካ ታናራ ሃሳይዛ ኪታንቻዛ፣ «ሃይቲ ዳቻ አዋ ኤፊዞ?» ጋ ኦይቻዲሰ።

¹¹ ኢዚካ፣ «ኢዛሰ ኬል ኬጻናሰ ሳናኦሬ ዴሬ ኤፊቲሰ፤ ኬጾቲ ጊጊዛ ዋዴ ዳቾዛ ሄን ዋላና» ጌዳሰ።

6

ዛካሪሲ አጂታን ቤኢዳ ፓራ-ጋሬታ

¹ ቃሴካ ሃራ አጂታን ኦይዱ ፓራ-ጋሬቲ ናምኡ ጸርቂማላ ዙማታ ጊዶራ ዪዛይታ ቤኢዲሰ።

² ኮይሮ ጋሬዛ ጎቺዛ ፓራዚ ዞኦ፣ ናምኢንጾዚ ካሬላ፣

³ ሄቫንጾዚ ቦላ፣ ኦይዳንጾዚ ቃሴ ማሳራ ጊዲሺን ፓራቲ ኡባይካ ዋልቃማ።

⁴ ታኒካ ታናራ ሃሳይዛ ኪታንቻዛ፣ «ታ ጎዳዉ! ሃይታንቲ አዜ?» ጋ ኦይቻዲሰ።

5 ኪታንቻዚካ፡ «ሃይቲ ሳኣ ኡባ ጎዳ ሲንፋን ኦፊዛሶፔ ኬዚዳ ሳሎ ኣያና ኦይዳታ።

6 ካሬላ ፓራቲ ጎቼዛ ጋሬይ ፑዴሃ ባጋ፡ ቦላ ፓራቲ ጎቼዛ ጋሬይ ኣርሼ ጌሎሶ ባጋ፡ ማሳራ ፓራቲ ጎቼዛ ፓራይ ዱጌሃ ባጋራ ዲዛ ዴሬ ቤቴስ» ጌዴስ።

7 ሚኖ ፓራቲ ቡሮ ኬዚሼ ቢታ ኡባ ቦላ ሲሜሬታናስ ሌሶቴቴስ፤ ኢዚካ ኢስታ፡ «ኢንቴ ሳኣ ኡባ ጋርስ ቢዲ ጸሞሲቴ» ጌዴስ፤ ኢስቲካ ቢዲ ጸሞሲዳ።

8 ቃሴካ ኪታንቻዚ ታስ፡ «ፑዴሃ ባጋ ዴሬታ ቢዳ ፓራቲ ታ ኣያና ሽሞፐሲዳ» ጌዲ ባ ቃላ ቶቄ ሂስቲ ዮቲዴስ።

ኢያሶ ሁኤ ቦላ ዋዲዳ ካላቻ

9 ጎዳ ቃላይ ታኮ ዪዴስ።

10 ባቢሎኔ ዴሬፔ ዲኦፔ ሲሚዳ ሄልዳዬፔኔ ያዳያፔ ዋርቃኔ ቢራ ኤካዳ ሄ ጋላሲካ ሶፎናሳ ና ኢዮሲያሳ ሶ ባ።

11 ኢስቲ ኢሚዳ ቢራፔኔ ዋርቃፌ ካላቻ ሜዳዳ ኢዮሳዶቄ ና ቄሴታ ሃላቃ ኢያሶ ሁኤን ጎጾ።

12 ኔኒ ኢዛስ፡ «ኡባፌ ዋልቃማ ጎዳይ፡ (ኢዛ ሱንፋይ ሃጋ) ጌቴቲዳይሲ ሃይሳ፤ ኢዚካ ባ ዲዛሶን ዳያና፤ ኢዚ ጎዳ ኬል ዛሪዲ ኬጾና።

13 ኢዚ ጎዳ ኬላ ኬጾና፤ ኢዚ ካዋ ማላ ቦንቾ ማይኣና፤ ባ ካዋቴላ ኣራታን ኡቲዲ ሃራና፤ ቃሴካ ኢዚ ባ ኣራታን ኡቲዲ ቄሴቴላን ኦሳና፤ ሄ ናምኣቲካ ሳሮቴላኒኔ ሲጋን ኦሳና» ጌሰ ጋ ዮታ።

14 ሄ ካላቻዚካ ሄሌሜስ፡ ጸቢያስ፡ ያዳያሲኔ ሶፎናሳ ና ሄኔሰ ጎዳ ኬላ ጌዶን ኢስቲ ሃሳኢሲዛዝ ጌዳና።

15 ሄይቲ ሃሆን ዲዛይቲ ዪዲ ጎዳ ኬላይ ኬጾቴሺን ኢስታ ኦሶን ማዳና፤ ኢንቴካ ታና ኡባፌ ዋልቃማ ጎዳይ ኪቲዳይሳ ኤራና። ጎዳ ኢንቴ ጸሳስ ኢንቴ ዋዚናፔ ኣዛዜቲኮ ሄሲ ዉሪ ኢንቴስ ሃናና።

7

ጎዳይ ኤኮንታ ጾማ

1 ዳሪዮሲ ካዋቲዳ ኦይዳንሶ ላይላን ካሴሎ ጌቴቲዛ ኤዱፋንፋ ኣጊናን ኦይዳንሶ ጋላስ ጎዳ ቃላይ ዛካራሳኮ ዪዴስ።

2 ቤቴሌ አሳይ ጎዳይ ዋሳናስ ሳርሳሬኔ ኤርጌሜ-ሜሌኬ ኢስታራ ዲዛይታራ ኢሲፌ ከቲዳ።

3 ኢስቲካ ኡባፌ ዋልቃማ ጎዳ ኬላ ቄሴታኔ ናቤታ፡ «ኮ ካሴ ዳሮ ዋዴ ኦሊዳይሳ ማላ ኢቻሻንላ አገናን ጨጫናሲኔ ጸማናስ ኮስ ቤሲዜ?» ጊዲ ኦይቺዳ።

4 ቃሴካ ጎዳ ቃላይ ታኮ ዪዴስ፤

5 «ሃ ዴሬ አሳኔ ቄሴታ፡ ሐሳኔ አቋዳ ላፑን ታሙ ላይላታን ኢቻሻንላ አገናኒኔ ላፑንላ አገናን ኢንቲ ጸሚዳ ጸማይኔ ኢንቲ ጨጫዳ ጨጫይ ታ ቦንቾሴ?»

6 ካሴ ኢንቲ ሚዳይሲኔ ኡዪዳይሲ ኢንቲስ ጸላ ጊዴኔ?

7 ዩሩሳላሚይኔ ኢዚ አቻን ዩዪ አቋ ዲዛ ካታማቲ ሳርቲላኒኔ ዲሬቲላን ዲዛ ዋዴ ዲጌሃ ባጋ ዙማታ ጋርሳኒኔ አርጄይ ጌሊዛ ባጋን ዲዛ ዙማታ ጋርሳን ካሴ አሲ ሄን ዲዛ ዋዴ ጎዳይ ባ ናቤታ ባጋራ ዮቲዳ ቃላይ ሃይሳ ጊዴኔ?» ጋ ኦይቻ።

8 ጎዳ ቃላይ ቃሴካ ዛካራሳኮ ዪዴስ፤

9 «ኡባፌ ዋልቃማ ጎዳይ፡ ሐሙ ፒርዳ ፒርዲቲ፤ ኢንቲ ጋርሳን ኢሶይ አሳራ ማሬቲቲኔ ኢሶይ አሳስ ቃጭቲቲ።

10 አምኤታ፡ ዩኡታ፡ ቤቲ አሳታኔ ማንቆታ ሜቶሶፍቲ፤ ኢሶይ አሳስ ኢንቲ ዋዚናን ኢታ ቆፖፍቲ፡ ጌስ።

11 «ኢስቲ ቃሴ ሲያና ኮዪቤቲና፤ ዘኮ ዛሪዲ ባ ሃይላ ቲጪዳ።

12 ባ ዋዚና ዛላ ሹቻ ማላ ሚንሊዳ፤ ኡባፌ ዋልቃማ ጎዳይ ካሴ ናቤታ ባጋራ ባ አያናን ከቲዳ ቃላ ዋይኮ ዋጋ ሲዮንታ ኢዲዳ፤ ሄሳ ጊሻስ ኡባፌ ዋልቃማ ጎዳይ ኢስታ ቦላ ኬሂ ሃንቄቲዴስ።

13 «ታ ኢስታ ጴይጊሺን ኢስታ ሲዪቤቲና፤ ሄሳ ጊሻስ ኢስቲ ታና ጴይጊሺን ታኒካ ሲዪኬ» ጌስ ኡባፌ ዋልቃማ ጎዳይ።

14 ኢስቲ ኤርንታ አላጋ ዴሬ ጊዶ ጎቲ ጫርኮን ኢስታ ላላዲስ፤ ኢስታፌ ጉዬራ ሃራይ ኦኒካ ሄ ቦንታ ማላኔ ሃ ዮንታ ማላ ቢታያ አሲ ባይንዳ ቡላ ቢታ ጊዳዱስ፤ ኢስቲ ሎኦ ቢታዮ ቡላ ኦሊዳይ ሄሳ ማላና።»

8

ዩሩሳላሚ ኦራላናስ ጎዳይ አሚዳ ሂዶታ

1 ቃሴካ ኡባፌ ዋልቃማ ጎዳይ ታኮ ዪዴስ፤

2 ኡባፌ ዋልቃማ ጎዳይ፡ «ታ ጸዮኒስ ዳሮ ሚሼታይስ፤ ኢዚ ሚሻይ ታና ጸጌስ» ጌስ።

3 ጎዳይ፥ «ታ ጌዴ ጸዮኒኮ ሲማና፤ ዬሩሳሌምንካ ዴኣና። ዬሩሳሌምይካ ቱሙ ካታማ ጌቲታዉስ፤ ኢዛካ ኡባፌ ዋልቃማ ጎዳስ ጌሻ ዙማ ጌቲታና» ጌስ።

4 ኡባፌ ዋልቃማ ጎዳይ፥ «ኣዴ ጪማቲኔ ማጫ ጪማቲ ካሴ ማላ ዬሩሳሌም ዴቡሻን ኡታና፤ ኢስታፌ ኢሶይ ኢሶይ ጪማቲላ ጋሶን ጉፌ ኣይኪዲ ሄሜታና።

5 ካታማይን ዲዛ ኦጌታን ካኢዛ ማጫ ናይቲኔ ኣቱማ ናይቲ ኩማና» ጌስ።

6 ኡባፌ ዋልቃማ ጎዳይ፥ «ሃይሲ ካሴ ዲኤቶንታ ኣቲዳ ኢስራኤሌ ናይታስ ማላሊሲዛዝ ሚሳታና ሺን ታና ኡባፌ ዋልቃማ ጎዳ ማላሊሳናስ ዳንዳይዜ?» ጌስ።

7 ኡባፌ ዋልቃማ ጎዳይ፥ «ታኒ ታ ዴሬታ ኣርሼይ ሞኪዛ ባጋ ዴሬታፔኔ ዉሊዛ ባጋ ዴሬታፔ ኣሻና።

8 ኢስቲ ዬሩሳሌምን ዴኣና ማላ ታ ኢስታ ዛራ ሃ ኤሃና፤ ኢስቲካ ታ ዴሬታ ጌዳና፤ ታኒካ ጸሎቴላኒኔ ኣማኔቴላን ኢስታ ጸሳ ጌዳና» ጌስ።

9 ኡባፌ ዋልቃማ ጎዳይ፥ «ኡባፌ ዋልቃማ ጎዳ ኬላስ ዮቺ ዬጌቲሺን ሄን ዲዛ ናቤቲ ዮቲዳ ቃላ ሃኢ ሲዪዛይቲ ኡባይ ኡባፌ ዋልቃማ ጎዳ ኬላ ኬጸናስ ኢንቲ ኩሼ ሚንሊቲ።

10 ሃይሳፌ ካሴ ኣሳስ ዳሞዛይ ኢማቲ ኤሬና፤ ሜሄሰካ ኪራይ ኢማቲ ኤሬና። ሞርኬይ ዲዛ ጊሻስ ኦኒካ ባ ኦሶ ዋጋራ ኦሴ ኤሬና፤ ካሴ ታኒ ኣሳይ ላጌይ ላጌ ቦላ ዴንዳና ማላ ኦሴዳ ጊሻስ ሄሲ ሃኒዴስ።

11 ሃኢ ቃሴ ታ ካሴ ኦሴዳ ማላ ሃይሳ ሃን ኣቲዳ ዴሬዛ ቦላ ኦሴኬ» ጌ ኣዋጅስ።

12 ዜሬላይ ሎኦ ሞካና፤ ዋይኔ ሚላይ ኣይፋና፤ ቢታይካ ካላ ኢማና፤ ሳሎይካ ኢራ ኢማና፤ ሄይታ ዉርሳካ ሃን ሃይሳን ኣቲዛ ዴሬዛስ ጸንጾ ሂስቲ ኢማና።

13 ዩሁዳ ዴሬኔ ኢስራኤሌ ዴሬ ኣሳቶ! ኢንቲ ካሴ ካዋቲላታ ጊዶን ቃንጌቲዳ ዴሬ ማላ ቆዴቲዴታ፤ ሃኢ ጊዲኮ ታ ኢንቲና ኣሻና፤ ኢንቲካ ኣንጆስ ጌዳና፤ ሄሳ ጊሻስ ባቦፍቲ፤ ሚኒቲ።

14 ኡባፌ ዋልቃማ ጎዳይ፥ «ካሴ ኢንቲ ኣዋቲ ታና ሃንቁሊዳ ጊሻስ ታኒካ ሚሻይ ባይንዳ ኢንቲና ቃጸያና ቃቻዲስ» ጌስ።

15 «ሃኢ ቃሴ ዬሩሳሌምኒኔ ዩሁዳ ዴራስ ሎኦ ኦላናስ ታ ቃቺዳ ጊሻስ ባቦፍቲ።

16 እንቲ ኦፋናስ ቤሲዛ ሚሻቲ ሃይታንታ፤ እንቲ እንቲ ጋርሳን ኢሶይ ኢሳራ ቱሙ ሃሳዬቲቲ፤ እንቲ ዱቡሻንካ ቱማኔ ሱሬ ፒርዳ ፒርዲቲ።

17 ኢሶይ ኢሳ ቆሃናስ ጌኔ ቆፖፍቲ፤ ዋርዶ ማርካቶፍቲ፤ ታ ሃይታንታ ኡባ ኢጻይስ» ጌስ ጎዳይ።

18 ቃሴካ ኡባፌ ዋልቃማ ጎዳ ቃላይ ታኮ ዪዴስ፤

19 «ኦይዳንሉ ኣገናን፤ ኢቻሻንሉ ኣገናን፤ ላፑንላ ኣገናኒኔ ታማንላ ኣገናን እንቲ ጸሚዛ ጸማይ ዩሁዳ ዴራስ ኡፋይሳ ጋላሲኔ ባኣሌ ጋላስ ጊዳና፤ ሄሳ ጊሻስ እንቲ ቱማቲሉኔ ሳሮቲሉ ኮዩቲ።»

20 ኡባፌ ዋልቃማ ጎዳይ፤ «ዳሮ ካታማታን ዲዛ ዴሬይ ዩሩሳላሜ ጎጋና ዋዴይ ያና።

21 ኢሲ ካታማይን ዲዛ ኣሳይካ፤ ሩሳዳ ኣንጅ ዋሳናሲኔ ኡባፌ ዋልቃማ ጎዳ ኮያናስ ኣኔ ሃ ዩቲ፤ ኣኔ ኤሶን ቦስ፤ ኦኒካ ቦስ፤ ጊሼ ሃራ ካታማ ባና።

22 ዳሮ ዴሬይኔ ዋልቃማ ካዋቲካ ኡባፌ ዋልቃማ ጎዳ ኮያናስኔ ኢዛ ዋሳናስ ዩሩሳላሜ ያና።

23 «ሄ ጋላሳታን ዱማ ዱማ ዴሬፔ ዱማ ዱማ ቃላን ሃሳይዛ ታሙ ኣሳቲ ኢሲ ኣይሁዳ ኣሳ ማይኦ ማጫራ ኦይኪዲ፤ ሩእንቲናራ ጸሲ ዲዛይሳ ኦ ሲዪዳ ጊሻስ ኦ እንቲናራ ኢሲፌ ባና፤ ጋና» ጊዴስ።

9

ኢስራኤሌ ኣሳ ሞርኬታ ቦላ ያና ፒርዳ

1 ኢስራኤሌ ኣሳ ኡባ ኣይፌይ

ፑዴ ጎዳኮ ጸሌስ፤

ሄሳ ጊሻስ ጎዳይ

ካሴ ዮቲ ዋሊዳ ማላ

ሴዲሬኬ ቦላኔ

ዳማስቆ ቦላ ፒርዳና።

2 ሃ ፒርዳዚካ ዳማስቆ ዛዋን ዲዛ

ሃማቲ ቦላ፤

ኣጵ ኤራቲሉ ዲዛ

ጸረሴ ካታማታ ቦላኔ

ሲዶና ካታማታ ቦላ ጋካና።

3 ጸረሴ ካታማያ ባስ ሚኖ

ሚጸ ጊጊሳዲስ፤

- ቢራ ቢታ ማለ፥
 ዋርቃካ ጉዲላ ማለ
 ሸሻ ጉፓዲሰ።
- 4 ጌዶ አቲን ጎዳይ
 ኢዛ ጉፒዳይሳ
 ዋሊ ኤካና፤
 ኢዚሰ አባ ጌዶን ዲዛ ዋልቃ
 ኡባ ሳይሳና፤
 ኢዛካ ታማን ጸጌታ ሳያና።
- 5 አሰቄሎናይ ሄሳ ቤኢዲ ያያና፤
 ጋዛይ ሜቶን ኡንኤታና፤
 ሄሳሐካ አቃሮኔይ
 ሂዶታካ ቃንጻና፤
 ጋዛይ ቃሴ
 ካዋይ ባይንዳሮ ጌዳና፤
 አሰቄሎናይ ቡላ ጌዳና።
- 6 ዋላካ ዳሬይ አዛጾኔ አይካና፤
 ጨቁቲዛ ፊሊሰጾሜ አሳ
 ታ ሳይሳና።
- 7 ታኒ ኢሰታ ደናፔ ሱሐ፥
 ኢሰታ ጋጮፔ ሞንታ ማለ
 ዲጌቲዳ ካላ ዲጋና፤
 ሃንኮ አቲዳይቲ ታ ዳሬ ጌዳና፤
 ዩሁዳ ቢታን ሃላቃታና፤
 አቃሮኔ አሳይካ
 ያቡሴ አሳ ማለ ጌዳና።
- 8 ታኒ ጌዲኮ ታ ከላ
 ቦንቁዛ ዋልቃማታፔ ናጋና፤
 ሃይሳፌ ጉዬ ኡንኤሊዛይ
 ታ ዳራ ላቴና።
 ታኒ ሃኢ ሚና ናጋይሰ።
- ቡሮ ያና ጸዮኔ ካዋ
- 9 ሃኔ ጸዮኔ ናዬ
 ከሃ ኡፋዬታ።
 ሃኔ ዬሩሳላሜ ናዬ

9:4 ኢሳ 23:1-18፤ ሂዚ 26:1—28:26፤ ኢዩ 3:4-8፤ አዋ 1:9-10፤ ማቶ 11:21-22፤ ሉቃ 10:13-14 9:5 ኢሳ 14:29-31፤ ኤር 47:1-7፤ ሂዚ 25:15-17፤ ኢዩ 3:4-8፤ አዋ 1:6-8፤ ሶፎ 2:4-7

- ኡፋይሳን ኢሊላ፤
 ጸሎኔ አሺዛ ኔ ካዎይ
 አሽኬ ጌዲዲ ሃሬዮኔ
 ሃሬይ ጉቲ ቶጌዲ ኔኮ ዬሰ።
- 10 ፓራ-ጋሬታ ኤፍሬሜፔ
 ኦላ ፓራታ ዬሩሳላሜፔ
 ታ ኤካ ጳይሳና።
 ታኒ ኦላ ቶራታ
 ሚንፊሬላና።
 ሳሮቴላ ካዎቴላታሰ አዋጃና።
 ኢዚ አባፌ አባን
 ጋካናሰ ሃራና፤
 ኤፊራጸሴ ሻፋፔ ሳኦ ጋጸ
 ጋካናሰ ኢዚ አይሳና።
- 11 ታ ኔናራ ሱላን
 ጫቄቲዳ ጫቆዛ ጊሻሰ
 ሃሊ ባይንዳ ኦላን
 ቃሼቲዳ አሳታ
 ታ ቢርሻዳ ዬዳና።
- 12 ኢንቴኖ ሂደታይ ዲዛ ቃሾ አሳቶ!
 ኢንቴ ካሴ ዲዛ ሚጸን ሲሚቴ፤
 ካሴ ኢንቴሰ ዲዛ አቆታ
 ደኮ ሂሰታ ታ ኢንቴሰ ዛራና።
- 13 ዩሁዳ ዋንዳፌ ማላ
 ኤፍሬሜካ ዪሻ ማላ
 ታ ጎኤታና፤
 ሃኔ ጸዮኔ ታኒ ኔ ናይታ
 ጌሪኬ ዴሬ ቦላ
 ዴንፊላና፤
 ኔናካ ታኒ ዋልቃማ
 ማሻ ማላ
 ሂሰታ ጎኤታና።
- ጎዳይ ቆንጫና
- 14 ጎዳይ ኢሰታ ቦላ ቆንጫና፤
 ኢዛ ዪሻይ ዋልቃንላ ማላ

- ፖፖልኤ ጋና፤
ኡባፌ ዋልቃማ ጎዳይ
ጸረምባ ፑናና።
ዱጌሃፔ ኬዚዛ ጎቲ ጫርኮ ማላ
ኢዚ ባና።
- 15 ኡባፌ ዋልቃማ ጎዳይ
ኢሰታሰ ጎንዳሌ ጊዳና፤
ኢሰቲ ባ ሞርኬታ
ኡባ ቆይሳና፤
ኢሰቲ ያንባርሻን
ኦሊዛይታ ዬቆና፤
ኢሰቲ ዋይኔ ኡሹ
ኡዬዳ አሳ ማላ ዋሳና፤
ያርሾ ሱሊ ኬሬ ኩሚ
ያርሾሶሆ ቦላ ጉኪዛ ማላ
ኢሰታ ሞርኬታ
ሱሊካ ጉካና።
- 16 ሄ ዋዴ ጎዳይ ኢሰታ ጸሳይ
ባ ዴራ ባሰ ዉዴ ሜሄ
ሂሰቲ አሻና፤
ካላቻ ቦላ ዲዛ
ሴሎይ ጸልቂዛ ማላ
ኢሰቲካ ጸሳ ዴሬን ጸላና።
- 17 ኢሰቲ አይ ማላ ሎኦኔ
ፑላ አሰ ጊዳኔሻ!
ካሊ ናቴላታ
ዋይኔ ኡሹ ጌላኦታ
ኣንቃርሳና።

10

- ጎዳይ ዩሁዳ ናጋናሰ ዋሊዳ ሂዶታ
- 1 ጎዳይ ኢንቴሰ አሱራ ኢራ
ኢማና ማላ ዋሲቴ።
ኢራ ሻራ ኪቲዛይ ጎዳ፤
ኢዚ ኡባ አሳሰ
ጊዲዛ ኢራ ኢሜሰ፤
ኢሳሰ ኢሳሰ ቶካናሰ
ዶዛ ኢሜሰ።

- 2 ኤቃ ጸሳቲ
 ባሌሶ የኦ የቴቲስ፤
 ማርቲ ዋርዶ ኣጂታ ቤዬቲስ፤
 ካዪዛይቲ ዋርዶ
 ኣጉሞ ኣጉሜቲቲስ፤
 ኣሳካ ጮ ሃዳ የኦን
 ሚንሌሌቲስ፤
 ሄሳ ጊሻስ ዴሬይ
 ሄሚዛዴይ ባይንዳ ዶርሳ ማላ
 ጮ ሚላ ቶይላቲሼ ቆሄቲዴስ።
- 3 ጎዳይ፥ «ታ ሃንቆይ
 ሄንፋንቻታ ቦላ
 ታማ ማላ ኤጺ ኬዚዴስ።
 ዴራ ካሌሊዛይታ
 ታ ቃጸያና።
 ታኒ ኡባፌ ዋልቃማ ጎዳይ
 ባ ዉዴ ጊዲዳ ዩሁዳ ኣሳ
 ኦላስ ጊጊዳ ፓራ ማላ ኦፋና።
- 4 ዩሁዳ፤ ጉላን ዋሊዛ
 ሹቲ፥
 ዲንካኔ ቶሊዛ ጳሽኬይ፥
 ኦላ ቶራይኔ
 ዴሬ ኡባ ሃሪዛይ ኬዛና።
- 5 ኢስቲ ኡባይካ ኢሲ ቦላ
 ኦጌን ዲዛ ኡርቃ ዩጳዛ
 ሚኖ ኦላንቻታ ማላ ጊዳና፤
 ጎዳይ ኢስታራ ዲዛ ጊሻስ
 ፓራን ኦሌቲዛይታ ኢስቲ ጸናና።
- 6 «ታኒ ዩሁዳ ኬሐ ሚንፋና፤
 ታ ኢስታስ ቃጴቲዛ ጊሻስ
 ኢስቲ ካሴ ዲዛሶታ ኢስታ ዛራና፤
 ታኒ ጎዳ ኢስታ ጸሳ ጊዲዳ ጊሻስ
 ታ ኢስታ ዋሳ ሲያና፤
 ኢስቲካ ሃይሳፌ ካሴ
 ታ ዩጋ ኤሮንታ
 ኣሳ ማላ ጊዳና።
- 7 ኤፍሬሜ ኣሳይ

- ዋልቃማ አሳ ማላ ጊዳና፤
 ኢሰታ ዋዚናይ
 ዋይኔ ኡሹ ኡዪዳ
 አሳ ማላ ኡፋዬታና፤
 ኢሰታ ናይቲ ኢሰታ
 ቤያናኔ ኡፋዬታና፤
 ኢሰቲካ ጎዳን ኡፋዬታና።
 8 ታኒ ኢሰታ ዋይቁላን ዴይጋዳ
 ኢሲ ቦላ ሺሻና፤
 ቱማፔ ታ ኢሰታ ዋዛና፤
 ካሴ ማላ ታ ኢሰታ ዳርሳና።
 9 ታኒ ኢሰታ ዴሬታ ጊዶን ላሊኮካ
 ኢሰቲ ሄን ሃሆ ዴሬን ዲሼ
 ታና ቆፓና፤
 ኢሰታኔ ኢሰታ ናይቲ
 ሼምፖራ ፓጻ አቲዲ
 ጉዬ ሲማና።
 10 ታኒ ኢሰታ ጊብጾፔ ኬሳና፤
 አሶሬፔካ ሺሻና፤
 ኢሰታሰ ኡቲዛሶይ
 ኡንኣናሼ ጋካናሰ
 ታኒ ኢሰታ ጋላኣዴኒኔ
 ሊባኖሴን ሺሻና።
 11 ኢሰቲ አባ ጊዶራ
 ዋዬቲ አቆና፤
 አባ ዳምባላይ ጮኡ ጋና፤
 ጨማ አባይካ ዉሪ ሚጫና፤
 ኦቶራንቻ አሶሬ ዴሬ
 አሳይ ካዉያና፤
 ጊብጾ ካዎቲላ
 ዳምኣይ ሜቃና።
 12 ታኒ ኢሰታ ጎዳን ሚንላና፤
 ኢሰቲካ ኢዛ ሱንላን
 ሲሜሬታና» ጌሰ።

11

ፒርዳ ሌሚሶ

- 1 ሊባኖሴ ኔናን ዲዛ
 ዚጋ ሚላ
 ታማይ ማና ማላ
 ኔ ፔንጌታ ደያ።
- 2 ጸዳቶ! ዚጋ ሚላይ
 ኩንዲዳ ገሻስ ዬከቲ፤
 ቦንቹቲዳ ሚላቲ ጳይዳ፤
 ባሳኔ ዋላቲ «ዉ! ዉይ»
 ገ ዋሲቲ፤
 ጲፒ ገዳ ዋራይ ቄጶቲዳስ።
- 3 ሄንላ ናይታ ዋሶ ሲዩቲ፤
 ኢስታ ቦንቹይ ቃሬቲዳስ፤
 ዮርዳኖሴ ሻፋ ደናን ዲዛ
 ጲፒ ገዳ ዋራይ
 ዉሪዳ ገሻስ
 ጋሞታ ጸጎ ሲዩቲ።

ናሞኡ ቆሞ ሄንላንቻታ

- 4 ጎዳ ታ ጸሳይ ኔና፡ «ሹኬታናስ ዶሬቲዳ ዶርሳታ ጲካ።
- 5 ኢስታ ሻሚ ሹኪዳይቲ ቃጸዬቲና፤ ኢስታ ባይዚዳይቲ፤
 ኅዳይ ጋላቲቶ፤ ኑ ዶሬቲዳስ፤ ጌቲስ። ኢስታ ሄሚዛይቲካ
 ኢስታስ ቃጴቲና።
- 6 «ሃይሳፌ ጉዬ ሃ ቢታይ ቦላ ዲዛ ኣሳስ ታ ቃጴቲኬ፤ ታኒ
 ታ ባጋራ ኢሳ ኢሳ ኢዛ ላጌሲኔ ኢዛ ካዎስ ኣላ ኢማና፤ ኢስቲካ
 ቢታ ኡንኤላና፤ ታኒካ ኢስታ ኢስታ ኩሼፔ ኣሺኬ» ጌሰ።
- 7 ሄሳ ገሻስ ታኒ ባይዚዛይታሲኔ ሻሚዛይታስ ቃጸሬታ
 ሹኬታናስ ዶሬቲዳ ዶርሳታ ሄሚዛይ ገዳዲስ፤ ዶርሳታካ ሄማሼ
 ናሞኡ ጉፊታ ኡካዳ ኢሳ፡ «ኪያቲል» ናሞኣንልዛ፡ «ኢሲፌቲል»
 ጋ ሱንላዲስ።
- 8 ኢሲ ኣገና ገደን ሜሄ ሄሚዛ ሄሻታ ዲጋዲስ፤ ኢስቲካ ታና
 ኢጲዳ ገሻስ ታኒካ ኢስታ ሳሌታዲስ።
- 9 ታኒ ኢስታስ፡ «ሃይሳፌ ጉዬ ታኒ ኢንቲና ሄሚኬ፤ ሃይቃናይቲ
 ሃይቄቶ፤ ጳያናይቲካ ጳዬቶ፤ ኣቲዳይቲካ ኢሶይ ኢሳ ኣሾ ሞ»
 ጋዲስ።
- 10 ቃሴካ ዳሬ ኡባራ ታ ጫቂቲዳ ቃላ ላላናስ፡ «ኪያቲል»
 ጋዳ ሱንላዲ ታ ጉፊዛ ሚንላዲስ።
- 11 ሄ ጋላስ ካሴ ጫቆዚ ሳሌቲዳስ፤ ኡንኤቲ ኡቲዲ ታና
 ጴሊዛ ዶርሳቲ ሄሲ ጎዳ ቃላ ገዲዳይሳ ኤሪዳ።

12 ታኒካ ኢስታስ፡ «ኢንቴስ ሎኦ ሚሳቲኮ ታ ዋጋ ታስ ቃንጺቲ፤ ኣካይ ጊኮ ኣጋጊቲ» ጋዲስ፤ ሄሳ ጊሻስ ኢስቲ ታስ ሄሹ ታሙ ሳቂሌ ቢራ ቃንጺዳ።

13 ጎዳይካ ኢስቲ ታስ ኢማና ጊጊዳ ካጼቲዳ ቢራ ኤካዳ፡ «ሚንጃ ኬላን ዋላ!» ጊዳስ። ታኒካ ሄ ሄሹ ታሙ ሳቂሌ ቢራ ኤካዳ ጎዳ ኬላ ጊደን ሚንጃሶን ዋላዲስ።

14 ሄሳፊ ቃሴ ኢስራኤሌኔ የሁዳ ኢሻቴላ ላላዳ፡ «ኢሲፌቴላ» ጋዳ ታ ሱንሊዳ ናሞኣንላ ጉፊዛካ ሚንላዲስ።

15 ቃሴካ ጎዳይ ታና፡ «ኣዛላ ሄንላንቻቲ ኦይኪዛ ሚሽ ኢስታፊ ዋላ ኤካ።

16 ሄኮ ታኒ ቢታ ቦላ ኦራላ ሄንላንቻ ዳንላና፤ ሄ ሄንላንቻይ ካሴ ጳይዳይሳ ዛሪ ቆፔና፤ ላሌቲዳይሳካ ኮዬና፤ ሚቂዳይሳካ ኮሌና፤ ፓጺዳይሳካ ጳኬና፤ ጊዶ ኣቲን ሞጲዳይሳ ኣሾ ማና፤ ቂንጨፊሌካ ኣሾንታ ዲፒ ሂስታና።

17 ዉዴዛ ዌጊ ኣጊዛ ጎኣይ ባይንዳ ሄንላንቻስ ኣዬ ኣና!
«ኢዛ ኡሻቻ ኣይፌኔ

ኢዛ ቂሴ ማሻይ ጫዶ፤

ኢዛ ቂሴይ ሲሎ፤

ኢዛ ኡሻቻ ኣይፌይካ

ቂልቾ ጊ ቆቆ» ጊዳስ።

12

ዩሩሳላሚስ ዲዛ ሂዶታ

1 ሳሎ ሚጨዳ ጎዳይ፡ ሳኣ ሜጲዳ ጎዳይ ኣሳ ናይታስ ዴኦ ሼምፖ ኢሚዳ ጎዳይ ኢስራኤሌ ናይታስ ዮቲዳ ቃላይ ሃይሳፊ ካሊዛይሳ፤

2 «ታኒ ዩሩሳላሚ ኢዞ ዩዩ ኣጲ ዲዛ ዴሬታስ ማሶሲዛ ዎይኔ ኡሹ ኢዛን ቲጊዛ ቢሪሌ ማላ ኦላና፤ ዩሩሳላሚ ዶዳና ማላ የሁዳ ካታማዮካ ዶዳና።

3 ቢታ ቦላ ዲዛ ዴሬይ ኢዚ ቦላ ዴንዲዛ ጋላስ ታኒ ዩሩሳላሚ ዴሬ ኡባስ ሱጊን ቃጽንታ ዛላ ኬሳና፤ ኢዞ ቃላና ፓጨ ጸሊዛይ ባስ ቆሄታና።

4 ሄ ጋላስ ታኒ ቶጋ ፓራታ ዳጋማን፡ ፓራታ ቶጊዳ ኣሳ ጎሻና፤ ኢስታ ሞርኬታ ፓራታ ቆቂሳና፤ ጊዶ ኣቲን የሁዳ ኣሳ ታኒ ታ ኪያ ኣይፊን ናጋና።

5 የሁዳ አሳ ካሌሊዛይቲ ባንታ ዋዚናን፤ ሉባፌ ዋልቃማ ጎዳይ ኢስታ ጾሲ ጊዲዳ ጊሻስ ዩሩሳሌምን ዲዛ አሳይ ሚና፤ ጋና።

6 «ታ ሄ ጋላስ የሁዳ ካሌሊዛይታ ዶሬ ሚላ ጊዶን ዲዛ ታማ ጮጮ ኬሳና፤ ካላ ሚርቄ ጊዶን ዲዛ ጸምፔ ላጮ ኬሳና፤ ኢስቲ ባፔ ሃዲርሳራኔ ኡሻቻራ ዩዩ ኣጲ ዲዛ ዳሬታ ጹጋና፤ ዩሩሳሌም ጊዲኮ ባ ዲዛሶፔ ሙሌካ ቃጹኩ።

7 «ዳዊቲሶ አሳኔ ዩሩሳሌምን ዲዛይታ ቦንቾይ የሁዳ ቦንቾፌ ኣጵንታ ማላ ታኒ ጎዳይ ካሴታዳ የሁዳ አሳስ ጸኖ ኢማና።

8 ሄ ጋላስ ኢስታ ጊዶን ዳሮ ላፋ ጊዲዳይ ዳዊቲ ማላ ሚና ጊዳና፤ ዳዊቲሶ አሳይ ቃሴ ኢስታፌ ሲንሐ ሲንሐ ቢዛ ጾሳ ማላኔ ጎዳ ኪታንቻ ማላ ጊዳና፤ ዩሩሳሌምን ዲዛይታስ ጎዳይ ጎንዳሌ ጊዳና።

9 ሄ ጋላስ ዩሩሳሌም ኦላና ዴንዲዛ ካዋቲላታ ኡባ ዳይሳናስ ታ ዴንዳና።

ባንቲ ጫዲዳይሳስ ዩኪዳ ዩሆ

10 «ሄ ዋዴ ዳዊቲ ኬላ አሳ ቦላኔ ዩሩሳሌምን ዲዛ አሳ ቦላ ኪያቲላ ኣያናኔ ዋሳ ኣያና ታ ጉሳና፤ ታና ጫዲዳይቲ ታኮ ጸላና፤ ኢስቲካ ኣሲ ባስ ዲዛ ኢሲ ናይ ሃይቁን ዩኪዛ አሳ ማላ ኢዛስ ዩካና፤ ባይራ ናስ ኣሲ ዩኪዛ ማላ ጫዋ ዩሆ ዩካና።

11 ሄ ዋዴ ማጊዶ ጌቲቲዛ ሃዳዴይ ኤርሞናስ ዩኮይሳሶ ዩሩሳሌምንካ ሄሳ ማላ ጊታ ዩሆ ጊዳና።

12 ቢታ ቦላ ዲዛ ቆሞይ ኡባይ ባስ ባስ ዩካና፤ ኢስታ ማቼቲካ ባስ ባስ ዩካና፤ ሄሳ ማላን ዳዊቲ ባጋፌ ኣቲማሳይ ባ ማቼታራ፤ ናታኔሶ አሳይ ባንታ ማቼታራ ዩካና።

13 ሌዌ ባጋቲ ባንታ ማቼታራ፤ ሺምኤ ባጋቲ ባንታ ማቼታራ፤

14 ሃንኮ ኣቲዳ ቆሞታፔ ኣቲማሳይ ኡባይ ባንታ ማቼታራ ዩካና» ጌሰ።

13

ናጋራፔ ጌማዛሙራ

1 ኡባፌ ዋልቃማ ጎዳይ፡ «ሄ ጋላስ ዳዊቲ ኬላ አሳኔ ዩሩሳሌምን ዲዛ አሳ ናጋራፔኔ ቱናቴላፌ ጌሻናስ ፑልቶይ ፑልታና።

2 «ታኒ ሄ ዋዴ ቢታፌ ኤቃ ጸሳታ ሱንሐ ጳይሳና፤ ሄሳፌ ናምኣንሉ ኢሰቲ ቆፌቴቴና፤ ኢሰታ ናቤታኔ ቱና ኣያናታ ቢታይ ቦላፌ ታ ዲጋና።

3 ኦኒካ ታኒ ናቤ ጊኮ ኢዛዴ ዬሊዳ ኣዋይኔ ኣዬያ ኢዛ ኔ ጎዳ ሱንላን ዋርዶ ሃሳይዳ ገሻሰ ኔሰ ሃይቆይ ቤሴሰ ጌቶ፤ ኢዚ ቲንቢቲ ሃሳይሺን ኢዛ ዬሊዳይቲ ኢዛ ጫዴቶ።

4 ሄ ዋዴ ዋርዶ ሃሳይዳዴይ ኦኒካ ባ ሃሳይዳ ዋርዶ ቲንቢቲን ዬላታና፤ ባሌላናሰ ኢሰኬራ ዲዛ ናቤታ ማይኦ ማይኤና።

5 ኢዚካ፡ ታ ገሻ ኣሳ ኣቲን ናቤ ጊዲኬ፤ ታ ናቴቴላፌ ዶማዳ ሃኖ ጋካናሰ ጎሻንቻ፤ ጋና።

6 ኢሲ ኣሲ፡ «ሂሲ ኔ ቦላ ኣይ ማዱንሐ?» ጊ ኦይቺኮ ኢዚ፡ ታ ሃይሳ ታ ላጌታሶን ዳሼ ማዱንጸዲሰን ጊዴሰ።

ሄንላንቻይ ሾጮቲን ኢዛ ዶርሳታ ላሌቴሐ

7 «ኡባፌ ዋልቃማ ጎዳይ፡

«ማሻ! ታ ሄንላንቻ

ታ ዳሮ ዶሲዛይሳ ቦላ ቤጋ!

ሄሚዛይሳ ሾጫ፤

ዶርሳቲካ ላሊታና፤

ታኒካ ታ ቁሴ ጉላታ ቦላ

ዴንላና » ጌሰ።

8 ጎዳይ፡ «ቢታ ኡባን ዲዛ

ሄሹ ኩሼ ኣሳፔ

ናምኡ ኩሼይ ጳያና፤

ኢሲ ኩሼ ኣሲ ኣታና።

9 ሄ ኣቲዳ ኢሲ ኩሼ ኣሳ

ታ ጌዴ ታማን ዬጋና፤

ቢራ ታማን ጌሺዛ ማላ

ታ ጌሻና፤

ዋርቃ ማላካ ፓጫና፤

ኢሰቲ ታ ሱንሐ ጴይጋና፤

ታኒካ ኢሰታሰ ኮያና፤

ታ ኢሰታሰ፡ ታ ዴሬታ፤ ጋና፤

ኢሰቲካ፡ «ኡ ጎዳ»

ጋና» ጊዴሰ።

14

ዬሩሳሌምን ካዎቱላታ

1 ሄኮ ጎዳይ ፒርዲዛ ጋላሲ ጋኪዳሰ፤ ኔፔ ቦንቂዳ ሚሻ ኔ ኣይፌይ ቤኢሺን ኢሰቲ ጊሼቲ ኤካና።

2 ዬሩሳሌም ኦላና ማላ ካዎቱላታ ኡባ ታ ሺሻና፤ ካታማያካ ኦይኬታና፤ ኬላ ጊዶን ዲዛ ሚሺ ቦንቂታና፤ ማጫሳታራካ ዎልቃን ኢቻና፤ ካታማ ኣሳፔ ባጋይ ዲኤታና፤ ኣቲዳ ዳሬይ ቃሴ ካታማይፔ ኬዜና።

3 ሄሳፌ ጉዬ ጎዳይ ካሴ ኦላ ጋላሰ ኦሌቲዛ ማላ ሄ ካዎቱላታ ኦላናሰ ዳንዳና።

4 ሄ ዎዴ ኢዛ ቶሆይ ዬሩሳሌምፔ ኣርሼይ ሞኪዛ ባጋራ ዳብራዛይቲ ዙማ ቦላ ኤቃና። ዳብራዛይቲ ዙማይካ ኣርሼይ ሞኪዛሶፕ ወሊዛሶ ጋካናሰ ናምኡ ኬዚ ሻኬቲ ዎቆና፤ ባጋ ዙማይ ፑዴሃ ባጋ፤ ባጋይ ዳጌሃ ባጋ ሻኬቲዲ ጊዶን ዎልቃማ ሾባይ ማዴታና።

5 ኢንቲኒካ ኣዜሌ ጋካናሰ ዙማ ታኒ ናምኡ ኬሲ ሻኪዳ ሾባራ ባቃታና፤ ካሴ ዩሁዳ ካዎ ኦዚያ ዎዴ ቢታይ ቃጺን ቤኒ ኢንቲ ኣዎቲ ጋንጊዳ ማላ ኢንቲ ጋንጋና፤ ሄሳፌ ጉዬ ጎዳ ታ ጸሳይ ጌሻታራ ኢሲፌ ያና።

6 ሄ ዎዴ ታ ኬንቾይ፤ ሻቺኔ ፖኦይ ሙሌካ ዳና።

7 ሄ ጋላሳይ ጋላሲኔ ቃማይ ባይንዳ ጎዳይ ኤሪዛ ዲማ ጋላሰ ጊዳና፤ ሄ ጋላሲ ፖኦይ ፖኦሺን ዳኣና።

8 ሄ ዎዴ ዬሩሳሌምፔ ዴኦ ሃሊ ፑልታና፤ ኢዛፔ ባጋይ ኣርሼይ ሞኪዛ ባጋን ዲዛ ሃይቆ ኣባን ጌላና፤ ባጋይ ቃሴ ኣርሼይ ወሊዛ ባጋራ ዲዛ ማዲቲራኔ ኣባን ጌላና፤ ቦኔ ጊዲን ባልጎ ጊዲን ላይሰ ኩሜሰ ፓጩይ ባይንዳ ጎጊሺ ዳኣና።

9 ሄ ዎዴ ጎዳይ ቢታ ኡባ ቦላ ካዎታና፤ ሄ ዎዴ ጎዳይ ኢሳ ጸላ፤ ኢዛ ሱንሳይካ ኢሳ ጊዳና።

10 ፑዴሃ ባጋራ ጌባፔ ደሚዲ ዬሩሳሌም ዳጌሃ ባጋራ ዲዛ ኣርሞኔ ካታማ ጋካናሰ ዲዛ ኣወራጃይ ቲቆ ደምባ ጊዳና፤ ዬሩሳሌም ካታማያ ቢኒያማ ፔንጌፌ ቤኒ ፔንጌ ጊናራኔ ጉላ ፔንጌ ጋካናሰ ሄሳሶካ ሃናኒኤሌ ጊምቤፌ ጌዴ ካዎ ኬላሶ ዎይኔ ኡሹ ጉምኢዛሶሆ ጋካናሰ ቶቁ ጋዳ ኢዛ ሚና ዳኣና።

11 ዬሩሳሌምይ ዳሮ ኣሲ ዳናሶ ጊዳና፤ ሄሳፌ ጉዬ ኢዛ ቆዩኩ፤ ኢዚን ዲዛ ዳሬይ ሄርጋይ ባይንዳ ዎፓን ዳና።

12 ዩራሳላሜ ኦላና ዴንዲዛ ዴሬ ቦላ ጎዳይ ቦሻ ሃርጌ ኤሃና፤ ኢስታ ሼምፖራ ፓጻ ዲሺን ኢስታ አሾይ ዋቃና፤ ኢስታ አይፌይኔ ኢንጸርሳይ ሄን ባ ዲዛሶን ዋቃና።

13 ሄ ዋዴ ጎዳይ ኢስታ ቦላ ሂርጋኔ ባቦ ዩዳና፤ ኢስቲካ ኢሶይ ኢሶይ ባ ላጌዛ ቦላ ቆሆ ጋላና።

14 የሁዳ አሳይ ዩራሳላሜ ባጋ ጊዲዲ ኦሌታና፤ ባና ዩዱ አዲዳ ካዋቴላቲ ሃሪዳ አቆታ ኡባ ዋርቃ፤ ቢራ፤ ማይኦኔ ቆዳይ ባይንዳ ሚሽ ዲኢ ኤካና።

15 ሄሳ ሚሳቲዛ ቦሻይ ሞርኬቲ ዲዛሶን ዲዛሶን፤ ፓራታ፤ ባቁሎታ፤ ጋሜላታኔ ሃሪታ ቦላኔ ሃራ ሜሄ ኡባ ቦላ ያና።

16 ሄሳፌ ጉዬ ዩራሳላሜ ኦላና ኬዚዳ ካዋቴላታ፤ ሃይቆንታ አቲዳ ኡባይ ኡባፌ ዋልቃማ ጎዳሰ ጎይናሰኔ ዳሴ ባኣሌ ቦንቻናሰ ላይላን ላይላን ዩራሳላሜን ሺቃና።

17 ኡባፌ ዋልቃማ ጎዳሰ ጎይናሰኔ ዩራሳላሜ ሺቆንታ ቢታ ካዋቴላታ ኡባሰ ኢራይ ቡኬና።

18 ጊብጼ አሳይካ ሄ ቦንታ ኢራይ ኢስታሰ ቡኬና፤ ዩራሳላሜ ኬዚዲ ዳሴ ባኣሌ ቦንቻንታ ኢዲዳ ካዋቴላታ ቦላ ጎዳይ ኤሃና ቦሻ ኢስታ ቦላ ኤሃና።

19 ጊብጼ አሳካ ጊዲን ሃራ ዴሬ አሳ ካዋታ ጊዲን፤ «ዳሴ ባኣሌ ኑ ቦንቻኮ» ጊኮ ኢስታ ቦላ ያና ቂጻቲይ ሃይሳፌ ቦላን ዲዛይታ፤

20 ሄ ዋዴ ፓራታ ቆዴን ቃሼቲዛ ዳላ ኡባ ቦላ፤ «ሃይሲ ጸሳሰ ዲማቲዳይሳ» ጊዛ ቃላይ ጸፊታና፤ ጎዳ ኬላ ጊደን ካል ካሊዛ ኦቶቲካ ያርሾ ያርሺዛሶ ሲንላን ዲዛ ሳኔታ ማላ ዲማታና።

21 ዩራሳላሜኒኔ የሁዳን ዲዛ ኦቶይ ዉሪካ ሜዴቴላ ኡባፌ ዋልቃማ ጎዳሰ ዲማቲዳዝ ጊዳና፤ ያርሾ ሺሺዛ አሳይ ዉሪካ ኦቶታ ኤኪዲ ያርሾ አሾ ኢስታን ዶይሳና፤ ሄ ዋዴ ኡባፌ ዋልቃማ ጎዳ ኬላ ጊደን አይ ዛልኣንቻይካ ዴና።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b